



**CONVENIO DE COLABORACIÓN ENTRE O CONCELLO DE VIGO E A UNIVERSIDADE DE VIGO PARA O DESENVOLVEMENTO DE PROGRAMAS DE AXUDAS AOS ALUMNOS.**

Vigo, 23 de decembro de dous mil dezanove.

**REUNIDOS**

Dunha parte, don Abel Caballero Álvarez, Alcalde de Vigo, designado na sesión do pleno da corporación do día 15 de xuño de 2019, en nome e representación deste Concello, en virtude do disposto nos artigos 21.1.b) e 124.4.a) da Lei 7/1985, do 2 de abril, reguladora das bases de réxime local (LRBRL), e no artigo 61.1.a) da Lei 5/1997, do 22 de xullo, reguladora da administración Local de Galicia (LALGA).

Doutra parte, don Manuel Joaquín Reigosa Roger, Reitor da Universidade de Vigo, nomeado segundo Decreto 59/2018, do 21 de maio, da Consellería de Educación e Ordenación Universitaria da Xunta de Galicia, en nome e representación desta institución, no uso das atribucións conferidas polo artigo 20 da Lei Orgánica 6/2001, do 21 de decembro, de Universidades (LOU), e o artigo 58.a) do Decreto 7/2010, do 14 de xaneiro, polo que se aproban os estatutos da Universidade de Vigo.

E, actuando dona María Concepción Campos Acuña, en calidade de secretaria do Goberno Local do Concello de Vigo, dando fe do acto.

Ambas as partes recoñécense mutuamente capacidade legal suficiente para subscribir o outorgamento de presente convenio e

**EXPOÑEN**

I.- Que en virtude do sinalado no artigo 25 da LRBRL, o Concello de Vigo ten competencias para a xestión dos seus intereses e para promover toda clase de actividades e prestar certos servizos públicos contribúan a satisfacer as necesidades e aspiracións da comunidade veciñal de Vigo.

Constitúe, para o Concello de Vigo, unha cuestión de "interese xeral" atender as necesidades específicas do alumnado da Universidade no Campus de Vigo, ao tempo que considera un valor importante para esta cidade o desenvolvemento da institución universitaria e o benestar dos seus integrantes.

Esta preocupación ponse de manifesto a través de distintas accións municipais, dende a cesión de espazos como o que alberga a Escola Universitaria de Estudos Empresariais, o edificio de Areal, a expropiación de terreos para o Campus Lagoas-Marcosende, a subvención aos usuarios do transporte público con destino ao citado Campus, o apoio a proxectos de emprego ou emprendedores do seu



estudantado e profesorado, así como outras cuestións desenvolvidas nestes 25 anos da institución académica.

II.- Que a Universidade de Vigo, de acordo co previsto na LOU e nos seus estatutos, presta o servizo público de ensino superior mediante a investigación, a docencia e o estudio; constituíndo funcións da Universidade ao servizo da sociedade as seguintes:

- Creación, desenvolvemento, transmisión e crítica da ciencia, da técnica e da cultura.
- A preparación para o exercicio de actividades profesionais que esixan a aplicación de coñecementos e métodos científicos e para a creación artística.
- A difusión, a valorización e a transferencia do coñecemento ao servizo da cultura, da calidade da vida e do desenvolvemento económico.
- A difusión do coñecemento e a cultura a través da extensión universitaria e a formación ao longo de toda a vida.

A Universidade de Vigo concibe a súa finalidade esencial como un servizo público de calidade orientado á procura de maiores niveis de benestar para o conxunto da sociedade por medio da busca de avances sociais, científicos e tecnolóxicos nun marco de valores éticos xeralmente aceptados.

Para o desenvolvemento dos obxectivos anteriores, a Universidade foi dotada de solo e infraestruturas que a converten hoxe nun actor fundamental da ordenación do territorio e a mobilidade da contorna metropolitana de Vigo.

III.- Que dentro das políticas educativas, e económicas en xeral, o Concello asume o compromiso de colaborar cos entes, organismos, administracións e axentes sociais más significativos no desenvolvemento dunha serie de accións culturais, deportivas, científicas, sociais e económicas que permitan lograr que os estudantes e, en xeral, os membros da comunidade universitaria máis desfavorecidos reciban axudas destinadas a mellorar a súa promoción no sistema educativo, redundando no beneficio da cidade en xeral. No orzamento municipal do presente exercicio está prevista unha aplicación orzamentaria 3231.480.00.00 "Uvigo, becas, transporte, comedor e outras cooperacións".

IV.- Que expresadas as anteriores competencias e obxectivos, o Concello e a Universidade de Vigo manifestan a súa intención de formalizar unha colaboración en distintos ámbitos de interese recíproco, que permita a ambas partes acadar de maneira satisfactoria os seus fins institucionais, de xeito que o conxunto da sociedade poida seguir avanzando no coñecemento, a innovación e na competitividade, cun modelo de desenvolvemento máis responsable, equitativo e sostible.

V.- Con base ao exposto e de conformidade co disposto no artigo 57 da LBRL e artigo 47.2 a) da LRXSP e co fin de regular a colaboración de ambas institucións as parte manifestan a súa vontade de asinar o presente convenio de acordo coas seguintes:



## **CLÁUSULAS:**

### **Primeira.- obxecto e finalidade do convenio**

O Concello de Vigo e a Universidade de Vigo pretenden con este convenio acadar unha maior integración social, cultural, e económica do alumnado da Universidade de Vigo e ao tempo contribuír na defensa e promoción dos intereses sociais que lle son propios mediante o desenvolvemento dun programa de concesión de axudas aos alumnos.

Este proxecto ten por finalidade conseguir que ningún alumno quede excluído dos estudos universitarios por razóns económicas. As bolsas que forman parte do programa teñen por obxecto garantir a igualdade de oportunidades do alumnado cunha situación económica ou circunstancias económicas ou familiares especiais que dificulten o limiten o seu acceso e permanencia na universidade.

### **Segunda .- Obrigas das partes.**

A Universidade de Vigo comprométese a desenvolver un programa de axudas destinadas aos alumnos con dificultades económicas que comprenderá bolsas de comedor, e axudas para estudiantes con circunstancias familiares ou económicas desfavorables na procura de que os mesmos poidan continuar realizando os seus estudos. Con este obxectivo convocará o programa de axudas que estime axeitadas destinadas a garantir que ningúen abandone os seus estudos polas dificultades sinaladas e elaborará as bases reguladoras das convocatorias garantindo a igualdade de oportunidades, asegurando a debida difusión entre os seus estudiantes. Así mesmo, xestionará o procedemento de outorgamento das bolsas de conformidade coas bases reguladoras, nas que se terá en conta o nivel de renda e condicións especiais dos solicitantes como a de ser vítima de violencia de xénero e outras circunstancias sociais.

O Concello de Vigo, pola súa parte, asume o compromiso de colaborar no financiamento deste programa cunha achega por importe de 350.000 euros con cargo a a aplicación orzamentaria 3231.480.00.00 "Uvigo, becas, transporte, comedor e outras cooperacións" no obxectivo de que ningúen quede excluído dos estudos universitarios por razóns económicas favorecendo a integración social destes estudiantes.

### **Terceira.- Mecanismo de seguimento e control.**

A vixilancia e o seguimento do convenio encomendase a unha comisión mixta integrada, por parte da Universidade de Vigo polo Vicerreitor de economía e a Xerente ou técnico no que se delegue, e por parte do Concello de Vigo, polo Concelleiro de Orzamentos de Facenda e a xefa do Servizo de educación ou técnico no que se delegue.

### **Cuarta.- Forma de pagamento.**

A Universidade xustificará a aplicación destes fondos mediante un informe das



actividades realizadas, o orzamento, e a relación de beneficiarios das bolsas outorgadas, xunto coa certificación do responsable da Tesoureira da Universidade na que conste que se realizou o ingreso polo importe da bolsa outorgada a cada un dos beneficiarios.

O Concello de Vigo aboará o importe da súa achega mediante transferencia a conta bancaria titularidade da Universidade de Vigo unha vez presentada por esta a documentación sinalada no apartado anterior, e previa comprobación de que o importe da achega municipal é inferior aos gastos derivados da execución do programa de axudas obxecto deste convenio.

#### **Quinta.- Información**

A Universidade de Vigo deberá facilitar toda a información que lle sexa requirida pola Concellería de Educación e Xuventude e pola Intervención Xeral Municipal, Tribunal de Contas e Consello de Contas no exercicio das súas funcións de fiscalización.

#### **Sexta.- Vixencia**

A vixencia do presente convenio abarca o período comprendido entre a súa sinatura e ata o 31 de decembro de 2019, co obxecto de proceder á tramitación da xustificación do mesmo.

#### **Séptima.- Modificación do convenio**

Calquera modificación non prevista do contido deste Convenio requirirá o acordo expreso das partes asinantes e instrumentarase mediante a correspondente Addenda.

#### **Oitava.-Protección de datos**

Os datos persoais da solicitante e o do seu representante serán incorporados aos ficheiros municipais. A finalidade da súa recollida é a instrucción do procedemento para a tramitación deste convenio.

Os ditos datos serán tratados e protexidos de acordo co previsto na Lei 39/2015, de 1 de outubro, do Procedemento Administrativo Común das Administracións Públicas, e na normativa de Protección de Datos de Carácter Persoal. Poderán exercer os dereitos de acceso, rectificación, cancelación e oposición ante o Concello de Vigo.

#### **Novena.-Causas de resolución.**

Son causas de resolución deste Convenio o mutuo acorda das parte e o incumprimento total ou parcial de calquera das cláusulas establecidas no mesmo de conformidade co previsto no artigo 51.2 da LRXSP, cos efectos establecidos no artigo 52 do referido texto legal.

#### **Décima.-Natureza xurídica e xurisdición competente.**

Este convenio terá carácter administrativo e rexerase polo establecido nas súas cláusulas quedando excluído da aplicación da normativa reguladora dos contratos



do sector público agás para a resolución de dúbidas ou lagoas.  
As cuestións litixiosas que puideran xurdir someteranse á xurisdición contencioso-administrativa.

**Décimo primeira - Transparencia**

Publicarase o convenio no Portal de Transparencia do Concello de Vigo de conformidade co disposto na Lei 19/2013 de Transparencia, Acceso á Información Pública e Bo Goberno.

Nota aclaratoria: No segundo parágrafo da páxina 1 deste convenio, a referencia ao artigo 58.a) do Decreto 7/2010, do 14 de xaneiro, polo que se aproban os estatutos da Universidade de Vigo, debe entenderse realizada ao artigo 29 dos Estatutos da Universidade de Vigo, aprobados por Decreto 13/2019, do 24 de xaneiro.

E, en proba da súa conformidade, firman o presente convenio, por triplicado exemplar, en Vigo, 23 de decembro de 2019."

O Reitor da Universidade

Manuel Joaquín Reigosa Roger

O Alcalde de Vigo



Abel Caballero Álvarez

A Secretaria do Goberno Local

Concepción Campos Acuña